

Bratau il scussal da Mustér cugl american



Riana Schmid da Val S. Pieder fa igl emprendissadi da cuschiniera el Puntreis Center da sanadad SA a Mustér. La stad vargada ha ella denton midau sia plazza da lavur ed ei serendida ell'America. Leu ha ella cuschinau duront in meins en in'ustria Svizra a New York. Turnada ei ella cun in tschuppel differentas experientschas, per exempel da cuschinar sin gas e ch'igl ei en auters loghens buc aschi cavigliau ed uorden sco ella cuschina a Mustér. Il patrùn da Riana Schmid, *Fatmir Spescha*, ei cuntents, co sia emprendista ei semidada. (fmr/st/ri) **Pagina 4**



Aschia vesa in tipic taglier svizzer ora egl Alpina a Greenport.



En sia lavur finala digl emprendissadi da cuschiniera relata Riana Schmid da sias experientschas ch'ella ha astgau far en ina cuschina a New York. FOTOS MAD

«A New York sun jeu vegnida pli sperta e segira»

Riana Schmid da Val S. Pieder fa actualmein igl emprendissadi da cuschiniera el Puntreis Center da sanadad SA a Mustér. La stad vargada ha ella astgau cuschinar duront in meins el restaurant Alpina a New York ed ei turnada ella patria cun in sacados plein experientschas per la veta.

SUSI ROTHMUND/FMR

Organisau quei brat dil plaz da lavur ha *Fatmir Spescha*, il schefcuschinier dil Puntreis Center da sanadad SA a Mustér. Igl emigrant svizzer, *Christoph Müller*, meina dapi onns il hotel Alpina a Greenport/New York. Igl onn vargau ha el contactau Fatmir Spescha per empustar siu cudisch da cuschinar «tratgas indigenas en niev vestgiu». Aschia ha igl autur dil cudisch nezegiau la caschun e dumandau Christoph Müller, sch'ei fussi pusseivel da porscher a sia emprendista *Riana Schmid* la pusseivladad da luvrar tier el per entginas jamnas. Il gastronom ell'America ha giu plascher dall'idea ed ei immediat staus prompts – aschia che Riana Schmid ha giu da pachetar las cofras igl uost e sgular vi sur mar.

S'adattada e semidada

L'emprendista da cuschiniera seregorda fetg bein dil mument cu Fatmir Spescha ha raquintau da ses plans da tarmetter ella per in meins a New York in ina cuschina d'in restaurant svizzer e di: «Jeu erel pauc incantada da midar plaz da lavur e ualti sceptica, mo pli datier ch'ei vegneva e pli fetg ch'jeu selegravel.» Sco ella raquenta era quasi tut empau auter: «A New York havein nus per exempel cuschinau mo sin gas, tut stueva ir spertezia e las reglas da higiena e far uorden eran meins severas ch'en Svizra. Quei vul buca dir ch'ei fussi stau tschuf, ei era semplamein buca tut entir, cavegliu e per-fetg sco jeu sun disada ella cuschina dalla casa Puntreis. Egl Alpina a Greenport ha ei denton plaschiu fetg bein a mi e cu gl engles hai jeu giu

«Mia finamira da quell'acziun ei stada quella da preparar ella aschi bein sco pusseivel pil mund cheuora e quei ei gartegiau.»

Fatmir Spescha,
schefcuschinier
Puntreis Center da sanadad SA

negins problems. Jeu hai profitau immens e sun vegnida bia pli segira da memezza.» Quei conferma era siu patrun Fatmir Spescha ed aschunta: «Mia finamira da quell'acziun ei stada quella da preparar ella aschi bein sco pusseivel pil mund cheuora e quei ei gartegiau. Riana ha empiriu fetg bia, ella communiche-scha ussa bia pli clar, ei pli sperta e lavura fetg bein sur sesezza.»

Negin emprendissadi

Ella cuschina digl Alpina ha Riana Schmid era empiriu da duvrar caussas che s'audan en Svizra plitost tier las vanzadiras. «Ei dat ina tratga da flurs sulegl che vegn appreciada dils hospis.

Da miu avis ei quei brav mutschignus, mo ins sa magliar», manegia ella riend. Impressiuau ella ha era la situaziun da ses collegas ella cuschina americana. «Ei fan buc in emprendissadi mobein ston entscheiver giudem e seluvrar siado – dil lava-tagliors entochen tiel schefcuschinier. Ils dis da lavur cuozzan 14 uras e quei sis dis ad jamna.» Tuttina hagi ella aunc anflau empau temps per scuvierer il contuorn e far enqual excursiun ed in tec shopping. «Quei ei l'emprema ga ch'jeu sun viaggiada persula aschi lunsch. Ensemen cun mia famiglia hai jeu gia astgau scuvierer massa tiaras sco la Tailanda, China ni era l'Indonesia. Far tals viadis persula ei schon tut auter – ha denton era bia avantatgs.»

Plans pil futur

Suenter igl emprendissadi luvras Riana Schmid bugen aunc in onn ella cuschina dil Puntreis. Era Fatmir Spescha salvass bugen ella, mo ha el il mument avunda personal. Per quei vegn Riana probablamein a far enqual sesiun, forse miez onn egl exterior e miez onn en Svizra – per emprender d'enconuscher empau il mund. Sia finamira a liunga veta ei denton in agen restaurant, quei savessi esser en Val S. Pieder ni forse era in'ustria alpestra. Co igl ei dad esser sur sesezza sa la giuvna da 18 onns s'imaginar. Siu tat era numnadamein era cuschinier ed el haveva mess en pei a Mumpf el cantun Argovia in survetsch da partis. «Gia da buoba hai jeu adina bugen gidau el e tier miu tat hai jeu era scuvretg mia pissiun per la vart culinaria e la gastronomia. Ina pissiun ch'ei aunc daventada pli intensiva a New York.»